

Flurin Caduff - Jamolli, Sedrun



* 16-03-1928

† 16-12-2003

Gia dapi quater meins ruaussa Flurin sin santeri sut la baselgia parochiala da s. Vigeli e spetga sin la levada empermessa dil Scaffider. Da seregurdar e tener en buna memoria ils morts ei ina digna vertid e mai memia tard. Per regurdientscha da nies trapassau in per cavazzins ord sia veta terrestra.

Flurin ei naschius ils 16 da mars 1928 sco emprem fegl da Gaudenz e Barla Cresenzia Caduff-Huonder. Els habitavan en Tges'alva a Sedrun. El haveva mo otg onns che sia mumma ei morta. Suenter in per onns marida siu bab cun Agatha Decurtins da Bugnei. Flurin ha frequentau la scola primara e reala a Sedrun. Essend dottaus cun bien talent eis el aunc staus per cuort temps el gimnasi a Mustér e lu era a Neuschatel e Vaduz a scola. Gl'onn 1948 ei la famiglia secasada a Pura el Tessin. Flurin haveva 20 onns. Scart da lavur. Mo el anfla tuttina lavur ella Val Maggia. Duront 5 onns lavura el leu. En quei temps empren el d'enconuscher sia futura dunna Liliana. 1954 dat ei nozzas e la giuvna lètg secasa a Sedrun en Tges'alva. La lètg vegn benedida cun 3 affons, che dattan grond plascher mo era lavur e quitau. Plitard han ils biadis legrau il Flurin ed el pupergnava quels cun prender els cun el a pesca ni sin ina tura cun auto.

Lavur ed engaschi a Sedrun.

Duront in onn tier ina firma da baghegiar. Silsuenter ha Flurin survegniu piazza stabla tier la Vifacier Furca Alpu. Duront ils onns dils implorts electrics deva ei bia lavur sin la staziun da Sedrun. Manevrar vidaneu carrs plascheva ad el. Pli tard eis el sescolaus vinavon e daventaus conductur. Duront 33 onns lavura el tier la Vifacier Furca Alpu, tochen tier la beinmeritada pensiun. Sin la lavur haveva Flurin buna luna. Darar ch'el schava siglir la chicra, e purtar suenter schabegiava mai. Ina qualitat speciala era ch'el saveva tgei ch'el leva. Aschia ei era il siemi dil mercedes ius en vigur. Sesend en quella limusina, sclareva sia fatscha cun in surrir e plascher. Per cuort'uriala in scart ni jass, ir a pesca ed era buna cusseida cun vischins ed enconuscents han empleniu il temps da serasontga.

Ils davos quater onns ha la sanadad schau suenter. Per la buna tgira da sia dunna e

ses cars ei Flurin semussaus engrazieivels. Suenter ina dimora el spital ed ina jamna egl asil a Curaglia ha el rendiu si'olma al Scaffider.

Car Flurin, Tia cara dunna, Tes affons, biadis, parents ed enconuschents ein trests, mo engrazian per tut Tiu bien prestau. Vegli il Segner a dar a Ti la pagaglia celestiala.
Ruaussa en pasch.

Pally Vinzens